

Scol Preparatorio Santa Jacinta tambe a uni na e plan di reforestacion di Aruba

PROME Minister mr. Mike Eman a haci un bishita na Scol Preparatorio Santa Jacinta na Dakota. Un bishita caminda a haya e oportunidad pa presenta locual e scol, cu masha orguyo ta aporta, pa asina sostene e plan di reforestacion di nos isla.

Durante e introduccion, Juffrouw Emma Carrascal a comparti e plan y meta pa cu e proyecto cu e scol tin. Lo planta mata di fruta y berdura den un area prepara specialmente pa e proyecto aki.

Den cuadro di scol saludabel, a inicia e preparacion, cu ayudo di boluntarionan y sosten grandi di Prome Minister, a fiha un meta cu pronto lo bira realidad.

Prome Minister Eman tambe a comparti algun palabra durante e bishita, y a indica riba e importancia di bishita partinan esencial di e bario, cual ta e scolnan, misanan y casnan.

Durante Accion di Bario, Prome Minister a bay dos scol, Scol Preparatorio Santa Jacinta y Pius X School, caminda a haci uzo di e oportunidad pa asina encurasha e muchanan pa mantene nan hardin y na e siguiente scol, e sosten na inicio di nan hardin cu pronto lo ta mes bunita cu esun di Pius X.

E alumnonan a regala Prome Minister Eman un mata carga cu vingerprint di un candidad di mucha. E lo haya un espacio bunita den Cocolishi y cu e mensahe di union di Scol Preparatorio Santa Jacinta y tur su almunonan, na e plan di Reforestacion di pais Aruba.

Un scol caminda e maestro y mayor ta traha hunto na bienestar di e alumno cu amor y cariño den un ambiente familiar, sigur y placentero pa stimula e desaroyo general y descubrimiento di su talentonan aportando na formacion di un ser humano humilde cu norma y balor.



Stichting Katholiek Onderwijs Aruba (SKOA).

Ta di admira e dedicaion y alegria cu ta resalta cerca cada docente, como tambe cada alumno cu e proyecto di planta mata, cual ta un estimulo grandi pa continua cu e meta di e 100 mil mata rond Aruba.

